



Uz 17. maj

Prava LGBT

Povodom 17. maja, Međunarodnog dana borbe protiv homofobije i transfobije, organizacije civilnog društva u našoj zemlji uputile su otvoreno pismo ministru za ljudska prava i izbjeglice Damiru Ljubiću koje donosimo u cijelosti

Poštovani gospodine,

Nadamo se da Vas ovo pismo zatiče u dobrom zdravlju i raspoloženju.

Pišemo Vam u ime organizacija civilnog društva povodom 17. maja - Međunarodnog dana borbe protiv homofobije i transfobije, koji se od 2005. godine obilježava u više od 70 zemalja svijeta i službeno je priznat od Parlamenta Evropske unije.

17. maja 1990. homoseksualnost je skinuta sa liste mentalnih bolesti Svjetske zdravstvene organizacije i od tada se taj dan obilježava kao podsjećanje na važnost poštivanja ljudskih prava LGBT osoba širom svijeta. To je također i povod za organizaciju različitih akcija kojima se skreće pažnja na diskriminaciju i nasilje s kojima se još suočava ova populacija. LGBT osobe čine 5-12% stanovništva svakog društva, pa tako i u Bosni i Hercegovini. Međutim, i pored toga, ovi građani i građanke BiH, zbog nasilja, straha i diskriminacije, ostaju u potpunosti nevidljivi u BiH društvu.

Bosna i Hercegovina do sada nije proaktivno radila na borbi protiv homofobije i transfobije, niti je poduzela odgovarajuće mjere kako bi svim LGBT osobama omogućila uživanje jednakih prava sa drugim građanima/kama BiH. Sjetimo se samo prijetnji, huškanja i fizičkih napada na LGBT osobe, ali i druge građane/ke Sarajeva na Queer Sarajevo Festivalu 2008. godine. Ovi slučajevi nikada nisu

procesuirani na adekvatan način, još se nalaze na Ustavnom sudu BiH. Svjedoci/kinje smo i drugih kršenja prava LGBT osoba, naročito kada su u pitanju nedavni ponovni fizički napadi i diskriminacija u obrazovanju, zdravstvu i na radnom mjestu.

Države u regiji Zapadnog Balkana su u mnogim pitanjima naprednije od BiH. U Hrvatskoj se već deset godina uspješno organizira godišnji protestni marš - Parada ponosa. Crna Gora je prva država u našoj regiji koja radi na izradi Akcionog plana za borbu protiv homofobije, a grupu predvodi osobno premijer Crne Gore. U Srbiji se trenutno radi na izradi i usvajanju zakona o registrovanom partnerstvu za istospolne parove. Albanija, također, u različitim ministarstvima radi na pitanjima zaštite prava LGBT osoba.

Ovim putem želimo Vas ohrabriti da se i državne institucije BiH, konkretno - Ministarstvo za ljudska prava i izbjeglice, koje Vi uspješno vodite, priključe projektu Vijeća Europe koji se implementira u svima državama regije, a koji se tiče proaktivnog angažmana državnih institucija za prava LGBT osoba. Smatramo da ne bismo trebali dopustiti da Bosna i Hercegovina bude izolovan slučaj u europskoj porodici država koje garantiraju jednaka prava svim svojim građankama i građanima, uključujući i LGBT osobe.

Organizacije civilnog društva će Vas vrlo rado podržati u tome. Stojimo Vam na raspolaganju!

Anes MAKUL, ACIPS, Sarajevo; Darijan BILIĆ, Akcija građana, Sarajevo; Snježana IVANČIĆ, Asocijacija demokratskih inicijativa, Sarajevo; Borka RUDIĆ, BH novinari; Gordana VIDOVIĆ, Budućnost, Modriča; Zulka BALJAK, Centar za građansku suradnju, Livno; Saša MADACKI, Centar za ljudska prava Univerziteta u Sarajevu; Zoran IVANČIĆ, Centar za zastupanje građanskih interesa, Sarajevo; Sumeja TULIĆ, Civil Rights Defenders, Sarajevo; Equilibrium, Banja Luka; Tija MEMIŠEVIĆ, Evropski istraživački centar, Sarajevo; Dobriša GOVEDARICA, Fond otvoreno društvo BiH, Sarajevo; Jadranka MILIČEVIĆ, Fondacija CURE, Sarajevo; Mirela GRÜNTHER ĐEČEVIĆ, Fondacija Heinrich Boell, Sarajevo; Valentina PELLIZZER, Fondacija Jedan svijet SEE, Sarajevo; Srđan DIZDAREVIĆ, Helsinški komitet za ljudska prava BiH, Sarajevo; Dženana ALADUZ, Infohouse, Sarajevo; Alma MEMIĆ, Inicijativa mladih za ljudska prava u BiH, Sarajevo; Nina GENNEBY, Kvinna till Kvinna, Sarajevo; Lasta, Drvar; Boro KONTIĆ, Mediacentar Sarajevo; Dražana LEPIR, Oštra nula, Banja Luka; Ferida DURAKOVIĆ, P.E.N. Centar u BiH, Sarajevo; Fedra IDŽAKOVIĆ, Prava za sve, Sarajevo; Saša GAVRIĆ, Sarajevski otvoreni centar; Edita MIFTARI, Tuzlanski otvoreni centar; Dražen CRNOMAT, UNSA Geto, Banja Luka; Ljiljana ZUROVAC, Vijeće za štampu BiH, Darko BRKAN, Zašto ne?, Sarajevo; Nuna ZVIZDIĆ, Žena ženama, Sarajevo